

史料叢刊初編

文海出版社
印行

史料叢刊初編

文海出版社印行

中華民國五十三年四月初版

史料叢刊初編精裝二冊

定價：新台幣

發行人：李

振

華


出版者：文

海出版社

台北縣永和鎮中興街九九巷八號
郵政劃撥戶第二七八四號

印刷者：文海出版社

經售者：全國各大書局



內政部登記證內版台業字第〇八〇〇號

壬戌春予既得大庫史料謀籌金築館以貯之而力未逮乃權賃僧寺暫安置之充閭塞牖不可展開而四方友人多移書問其中所有苦無以應乃運其少半至津沽以數月之力檢理其千百之一二沈乙庵尙書聞而欣然函問何時可畢事予報書曰檢理之事以近數月爲比例十夫之力約十年當可竟顧檢查須曠宅就理者須部署庋置均非建專館不可顧以前稱貸既竭吾力將何從突兀見此屋耶卽幸一二年間此屋告成天假我年俾得竟清釐之事典守傳布又將於誰望之私意此事竟非一二人之力所能及而又何能執塗人而語之若得三五同志協力圖之一面鳩金建築一而貸大屋從事檢理檢理所得隨時刊布假以月成百紙計則十年得萬餘紙是檢理告終緊要史材亦得大要矣雖然茫

茫人海何從竟得其人亦託諸空言而已尙書復書曰尊論不刊天壤之大德必有鄰鄙人將傳布公旨冀以殘年得觀盛事乃未幾而尙書遽歸道山益無可與謀此者去年夏予既叛東方文化學會印刷局乃寫定史料之已檢理可校寫者二十二種付之手民顏之曰史料初編當繼是而二三以至十百然固非予力所能任也而尙書所謂德隣者將旦夕遇之耶抑畢吾世不可邁耶予且企足以俟之矣書成爰弁言於首王觀堂徵君曾爲作庫書樓記並揭之卷端俾寰宇學者知此事顛末焉甲子六月上虞羅振玉書

庫書樓記

光宣之間我中國新出之史料凡四一曰殷虛之甲骨二曰漢晉之簡牘三曰六朝及有唐之卷軸而內閣大庫之元明及國朝文書實居其四顧殷虛甲骨當其初出世已視爲骨董之一土人仍歲所掘率得善價以去幸無毀棄者而西陲簡牘卷軸外人至不遠數萬里歷寒暑冒艱險以出之其保藏之法尤備獨內閣文書除宋元刊寫本書籍入京師圖書館外其餘十三年之間幾燬者再而卒獲全者雖曰人事蓋亦有天意焉案內閣典籍廳大庫爲大樓六間其中書籍居十之三案卷居十之七其書多明文淵閣之遺其案卷則有列朝之 硃諭 敕諭內外臣工之黃本題本奏本外藩屬國之表章歷科殿試之大卷其他三百年間檔冊文移往

往而在而元明遺物亦間出其中蓋今之內閣自明永樂至於國朝雍正歷兩朝十有五帝實爲萬幾百度從出之地雍正以後政務移於軍機處而內閣尙受其成事凡政府所奉之 硃諭臣工所繳之 敕書 批摺胥奉儲於此蓋兼宋時宮中之龍圖天章諸閣省中之制敕庫班簿房而一之然三百年來除舍人省吏循例編目外學士大夫罕有窺其美富者宣統元年大庫屋壞有事繕完乃暫移於 文華殿之兩廡地隘不足容其露積庫垣內者尙半外廷始稍稍知之時南皮張文襄公方以大學士軍機大臣管學部事奏請以閣中所藏四朝書籍設學部京師圖書館其案卷則閣議概以舊檔無用奏請焚燬已得 俞旨矣適上虞羅叔言參事以學部屬官赴內閣參與交割事見庫垣中文籍山積皆奏

準焚燬之物偶抽一束觀之則管制府幹貞督漕時奏摺又取觀他束則文成公阿桂征金川時所奏皆當時歲終繳進之本排比日月具有次第乃亟請於文襄罷焚燬之舉而以其物歸學部藏諸國子監之南學其歷科殿試卷則藏諸學部大堂之後樓辛壬以後學部後樓及南學之藏又移於午門樓上所謂歷史博物館者越十年館中資費絀無以給升斗乃斥其所藏四分之三以售諸故紙商其數以麻袋計者七千以斤計者十有五萬得銀幣四千圓時辛酉冬日也壬戌二月參事以事至京師於市肆見洪文襄揭帖及高麗國王貢物表識爲大庫物因蹤跡之得諸某紙鋪則庫藏具在將毀之以造俗所謂還魂紙者已載數車赴西山矣亟三倍其直償之稱貸京津間得銀萬三千圓遂以易之於是此

七千袋十五萬斤之文書卒歸於參事參事將築庫書樓以儲之而屬余爲之記余謂此書瀕燬者再而參事再存之其事不可謂不偶然固非參事能存之也國朝祖宗聖德神功之懿典章制度聲名文物之盛先正訐謏遠猷之富與夫元明以來史事之至顯至隱固萬萬無亡理天特假手於參事以存之耳然非篤於好古如參事者又烏足以與於斯役也參事夙以收藏雄海內其天津之嘉樂里第有殷時甲骨數萬枚古器物數千品魏晉以降碑誌數十石金石拓本及經籍各數萬種實三古文化學術之淵藪今者又得此大庫之書宸翰之樓大雲之庫與斯樓鼎峙北海濱世有張茂先必將見有慶雲休氣發於漢津箕斗之間而三垣十二次無不浴其光景者何其裨歟雖然參事固不徒以收藏名

家者也其於所得之殷虛文字固已編之印之考之釋之其
他若流沙墜簡若鳴沙石室古佚書等凡數十種先後繼出
傳古之功求之古今人未見其比今茲所得又將以十年之
力檢校編錄而擇其尤重要者次第印行其事誠至艱且鉅
然以前事徵之余信參事之必能辦此也其諸山川重秀天
地再清舉斯樓之藏還之 天府以備石室金匱之儲至千
萬世傳之無窮余又信參事之必有樂乎此也然則斯書之
歸參事蓋猶非參事之志歟壬戌七月海甯王國維

太宗文皇帝日錄殘卷

史料叢刊

臣 羅 振玉 恭錄

天聰二年戊辰正月朔

上率諸貝子大人詣

□行禮畢

闕

大人俱依品級行禮

正月十六日

貝勒女爲公主賜婚廓爾沁滿諸西里太吉

二月初一日蒙古哈喇親部榻布囊等□布地杜凌□英脫

內袞卽諾岡荅喇完旦衛徵惡爾黑貝子榻布囊等奏

上□哈喇主無道殺其族黨而沒其家產此

闕

子所共知

也欺侮我等哈喇親部土門而取其子女牲畜我主布言

阿海博灼可免主惡爾多思卽儂與永夏博阿梭特阿布

岡哈爾哈等至土模對格根汗州駐之殺查哈喇兵四萬
我主布言阿海率兵十萬至時查哈喇三千人至八演速
白地索賞于漢人因未與而回查哈喇親遇索賞之人盡
殺之左側阿魯部三阿布岡哈爾哈欲率我等起兵思與
上同往何如伏冀

上裁

初二日額都八吐魯子免爾格時爲一品遊擊以三品總兵
官陞之命爲固山額眞陞方東札爾古七子查□你爲總
兵官

初八日高麗王李棕使總兵官李蘭副將朴蘭來修春信之
禮以方物入貢

上遣使往哈喇親部被查哈喇部多羅忒截殺凡兩次

上命貝子群臣戒之曰此番而來者皆精選兵丁安得多
人當相機行之慎勿滋亂十五日

上諭衆貝子曰爾等率精兵前進倘遇敵人出奇計以擒
之至于彼處敵之有無其信當無不知者我率衆營以隨
爾等之後前進貝子執一人而問之云凡塞冷清八徒衆
通國之人俱潛駐敖木論地方于是各披甲以待後至之
兵

上同貝子策馬親至多羅忒國多爾卽哈貪八吐爾被創
逃出盡獲其妻子將古魯太吉殺之所俘之衆計一萬一
千二百所得蒙古漢人共一千四百編爲戶口餘者爲奴
十七日以兵勝行叩

□□□俘之衆賞給被傷官兵有差二十一日仍回放搶

擇精騎追去是役也得馬一百三十匹牛七十隻所俘之衆賞□出征官兵二十四日自查哈喇部逃走人丁蹣踪搜緝時

上自率貝子策馬同往復獲二百戶次日殺牛八隻祭天

上遣使致書於哈喇親部我爾黑貝子榻布囊等來書云查哈喇主生而無道又與我國議和今果實講結好之道當令二榻布囊爲首我爾黑貝子亦令各遣使來凡有所言一一與彼悉之

三月初七日

上曰蒙天眷佑以幼弟而率微兵往征異國幸獲全勝喜何如之欲賜二弟名 貝勒賜名曰墨勒根大清多

多貝勒賜名曰額爾克捌胡爾遂以賜名之禮大宴之是日

聖駕赴瀋陽城守有阿敏貝勒都督貝勒約脫貝勒率衆貝勒羣臣出迎十里許各依品級以次朝見相抱作禮凡出征貝子羣臣與來迎貝子羣臣亦各依品級朝見相抱作禮俱畢從此起行申時至瀋陽城詣壇行禮畢回宮

二十七日

上旨下凡本國之人窮困而無妻室者出庫銀散給之各令娶妻

二十九日罷阿山弟阿打害官先是阿布太那格出女額爾克綽胡爾欲娶之

上紫貝子未嘗與聞阿吉格貝勒私託阿打害爲媒往說復同阿打害視其女以是治阿吉格貝勒罪罰銀一千兩馬一匹雕花鞍轡盔甲進

上又罰雕花鞍轡及馬各一與三昂邦貝勒又罰鞍轡及馬各一與八貝子罷其固山貝勒職令弟墨勒根大清代之阿布太那克出時爲遊擊今降備禦罰銀二百兩阿打害因爲媒議斬以

太祖武皇帝恩養有素故赦其斬罪而沒其家產之半

四月初三日賜敖杭部梭訥木篤冷駙馬名曰吉儂

初七日

上念築牛莊城之人勞苦賜牛四十隻犒之

二十五日

上聞八林部塞忒爾貝勒塞冷洪太吉阿約西太吉滿洲西里太吉等進牛駝等物來朝

上率衆貝子出迎五里許賜以大宴先是塞忒爾塞冷等原係蒙古哈爾哈國八林部貝子蒙古查哈喇部主靈當破哈爾哈後塞忒爾昂阿率本國附蒙古濃部廓爾沁貝子復加凌虐因率所屬來歸

四月明總兵官毛文龍駐札南海皮島誘招遼東人民使富者皆爲毛姓若其弟與子孫然且殺我逃亡首級詐稱陣獲欺奏其主其主臣皆信陞爲大都督總兵官凡海島官民賞罰陞降生殺悉聽之乃毛文龍復從而與滿洲議和數遣書來

上命廓廓亦執書報之同四人往彼及廓廓等來往已數